



RIBA E CABEZ DI CLABO

RECORDA BO PASADO, CONTA BO YIUNAN (1)

Esakinan ta trata un set di articulo pa wordo warda como recuerdo di loke tabata custumbernan, y moda den pasado. Articulanon pa trece lectornan di edad halto back pa nan infancia y hubentud, y articulanon pa e lectornan aki por corda mas di loke nan a pasa aden pa conta nan yiunan y nietonan di e tempo dushi di “nan tempo”. Mi a resumi hopi di e topiconan y a laga hopi afo pa wordo usa na otro ocasion di publica.

DI CARSONSIYO PA SHORT DI BOXEO

No mucho tempo pasa mi tabata conversa di “cosnan di hende bieu”, y mi a bin tende con na comienzo di siglo pasa, como paña di abao, e hombernan tabata bisti BVD, --- un flanel di catuna pega na un carson di catuna, te na bo rudia of poco bao di bo rudia. Mi a tene e nomber ey den mi memoria, pasobra segun mi esey tabata e “carsonsiyo manga larga” cu tabata papia di dje tempo mi tabata mucha. Pero buscando mas informacion, a resulta cu mi no por a haya hende pa bisami con e paña di abao di catuna ey yama, fuera di e “carsonsiyo manga largo of “Long John” cu nos tabata conoce. Mi a bin haya sa si cu BVD tabata e carsonsiyo cu a bira popular despues di yegada di Lago.

E BVD tabata e marca y no e modelo. E tabata un carsonsiyo, di un tela manera paña di pruga (of purga), cu 2 of 3 boton dilanti, y streki na barica, pa mara esaki na bo cintura. Imaginabo cu na momento di habri craanchi den pura, bo tin cu “frommel” cu dos pa tres boton y pa ora bo a logra esaki, ya henter bo curpa ta muha. Despues di e carsonsiyo, ata e jockey a bin na moda. Tur hende tabata bisti jockey y na Aruba nunca a tene cuenta cu “Jockey” ta un marca. E paña di abao aki ta un jockey, ni maske ki marca e tabata tin. Te awe mayoria di hende homber ta bisti jockey, y no e marca, apesar cu e agente di Jockey no tabata kier pa e palabra “jockey” wordo usa pa indica e paña di abao, pasobra ta trata di un marca registra. Esaki ta ponemi corda riba Frigidaire, Jeep, Kodak, Crescent Wrench entre otro. Nos tur tin frigidair (frishider) den cas. Mi ta mira e agente di e marca Frigidaire bin prohibi tur hende di usa e palabra aki pasobra ta trata di nomber di un marca registra. Nos lo tin cu yame “caha di ijs” basa riba e “ijskast” of e “ice-box”. E otro marca conoci tabata Kodak. Di añanan 40 te mey mey di decada 70 por a tende di kodak, ora bo ta papia di un camera di saca potret. Ainda tin hende cu no ta papia di camera, pero ta bisabo: “Busca un kodak pa saca mi potret”. E agente di Kodak nunca tabata tin problema cu esaki sino awe nos lo ta yama e aparato un “sacado di spirito” di hende. E unico problema cu tin, ta cu na lugar di camera ta usa camara, of na lugar di camara ta usa camera. Pa bini bek riba e jockey. E paña di abao “carsonsiyo cu manga”, cu a pasa pa BVD, cu a pasa pa jockey, a cambia tambe, pasobra den e tempo moderno a bini e asina yama G-string, cu ta un liña cu ta pasa rond di barica, y un liña cu ta pasa den “Rooi Rubiano” y topa cu un “saco di warda kiniki”. Tin tambe e otro, “jock-string”. Esey tabata pa e hombernan “macho” cu ta play “macho sexy”. Despues cu Michael Jordan a bira mundialmente famoso, y a retira, un paña di abao nobo a bira famoso na Aruba, y esey a bira e “boxershort”. Y toch te ainda, si bo ta bisti un Long John, un BVD, un jockey of un boxershort, toch nan ta bisa: “pasami mi carsonsiyo!”

LOKE TABATA NA MODA:

Den decada 50 di siglo pasa, tabata tin varios cos cu a bira moda grandi. Tabata tin un periodo cu homber y muher tabata tin nan “Mambo Hat”, un sombre grandi di cabana, cu tabata di un color so, color di e cabana, pero despues tabata tin sombre nan cu diferente color y dibuho. Tabata tin tambe periodo di e “sombre mexicano”, y aki tambe homber y muher tabata tin nan sombre, tambe di varios color.

E sombre nan aki tabata wordo bisti na manera normal, of tabata dobla e parti dilanti, of parti patras, of tabata dobla e dos bandanan, dependiendo ki estilo bo ta prefera. Esaki tabata wordo bisti (mescos cu e Mambo Hat) tin ora hasta paden pafu, of pafu paden. Despues cu Rolando La Serie a bira popular cu su merenguenan, e petchi (estilo portugues of boina) cu e tabata bisti, a bira un articulo di moda tambe. Principalmente hendenan homber tabata percura pa cumpra nan petchi estilo Rolando La Serie. E cantante tumbero Juancho Kock d.f.m. tabata conoci pa e tipo di petchi aki.

Bistimento di sombre desde decada 40 pa awe, nunca a drenta bira moda. Sombre tabata moda for di 1900 bin dilanti. Moda tabata tambe principalmente e sinceria cu awe no ta mira mas.. Petchi a bira popular y te awe ta un di e cosnan preferi di hobennan. E hoolahoop tambe tabata na moda. Hopi tabata desconfia di hoolahoop, ya cu tur sorto di rumor tabata existi rond di hoolahoop. Bo ta saca bo heup for di lugar; bo ta habri bo lomba; e ta kita bo hombra; e ta stroba muhernan di sali na estado, etc. A pesar di tur esaki, grandi y chiquito tabata goza di nan hoolahoop, y tabata tin tamaño di hoolahoop pa mucha te cu hende grandi. Concursonan di baile di hoolahoop tabata hopi. Esun cu por wanta e renchi di plastic bira rond di nan curpa, mas tanto; esun cu por balia cu mas tanto hoolahoop riba otro y wanta esakinan ta draai mas largo; esun cu por balia cu hoolahoop (of varios di nan) na cintura, tur dos braza (un of mas na cada braza) y na mes momento draai hoolahoop na pia tambe, ta bira ganador. Tur sorto di kenshi tabata experimenta cune pa ta un bon bailador di hoolahoop. Mi ta corda tambe e periodo di penchi. Den

decada 50 tabata tin tambe e “moda di penchi”. Por a haya penchinan di plastic, (di forma di penchi di cologa paña na cabuya) y ta bisti esaki na kraag, of na blusa y camisa. Nan tabata varia di 2 centimeter pa 6 centimeter di largura. Hopi tabata show cu varios penchi na kraag y varios penchi di garganta te cintura na e rand di camisa unda ta botona esaki. E penchinan tabata di tur sorto di color, y mas penchi bo tabatin, mas “in” bo tabata. Si ta un so bo tabatin, bo ta conta, pero sin peso, pasobra ta un hende por a regalabo un tambe.

Masha popular tabata e regalonan di Cracker Jack. Cada regalito di Cracker Jack tabata manera un producto di moda. Cu masha orguyo bo tabata bisti e renchi di plastic na dede. A bini tambe e bals Chic cu su regalito y esaki tambe tabata masha popular y yuda core cu Chiclets, e tempo ey. Mescos tambe tabata tempo cu Bubble Gum a bini na moda.. E bubblegum a conquista mercado y tabata bini cu un plaatchi estilo comics y a domina e balsnan cu tabata tin e tempo ey, e Wrigley y e Chiclets. Bubble Gum a bira mas popular ainda ora cu por a cumpra e sorto cu ta bini cu plaatchinan di figuranan di baseball grandes ligas. Por a spaar e carchinan y tabata tin un intercambio pisa entre homber y muher cu tabata spaar esakinan. Tin ora carchinan double tabata wordo bendi y si bo mester di e pelotero ey, bo ta paga ki prijs cu ta pa haye.

Den decada 80 caarchinan di baseball, esta di peloteronan, a bin na moda atrobe, pero no a wanta mucho tempo. Charlie's Angels, den decada 70 tambe tabata popular. Bo ta spaar potretnan of carchinan di Charlie's Angels y gasta masha placa, pero esnan di mas importante nunca a bin riba mercado pa bo yena bo poster. Tambe por corda e carchinan di Star Wars den tempo mas moderno, pero esaki no a pega manera caarchinan di prome cu esey.

Den decada 50 y comienzo di 60 tabatin carchinan di artistanan di pelicula. Bo ta cumpra bubblegum, djis pa haya e carchinan aki pa cera bo coleccion. No tabata tin un artista conoci di pelicula cu no tabata tin su carchi y mas bo cumpra, mas bo ta hayabo ta cumpra djis pa haya e “unico” carchi ainda cu ta faltabo y cu nunca ta bin. Tabata tin periodo di colga yabero rond di bo curpa. Principalmente mucha muhernan tabata loco cu esaki, y nan tabata tin yabero na paña y tambe na tas, cu cabuya yen di yabero ta cologa.

Popular tabata tambe coremento cu schaats. Si bo por a core cu schaats na cada pia, ta “baas” bo tabata, y ki bunita tabata pa mira e personanan aki haci nan keenshi. Hopi a “donder” abao y termina cu man of pia den gips tambe.

GLAS, CUCHARA, TAYO Y ASBAK DI RECUERDO

Despues cu Aruba Caribbean Hotel a habri su porta, por a ripara cuanto “Ladron” tin na Aruba. Sinembargo, ningun por a wordo considera ladron, pasobra e “hortamento” di glas, cuchara, forki, cuchu, tayo y asbak” di hotel e tempo ey tabata un “moda” nobo na Aruba. Tabata un “kick” pa bay cu esakinan. Hasta den avionnan di KLM pa bay Hulanda, e cuchara, forki y cuchun di plata puro tabata termina den tas. Tur hende kier a tin un recuerdo y aki recuerdo di hotel tabata “e cos” cu yegada di Aruba Caribbean Hotel. A bini acerca Holiday Inn, despues Sheraton y Americana Hotel, y e “fiamento” di e articulanon aki a crece.

Den masha cas por a mira cashi den sala yena cu glas di propaganda, asbak di propaganda, scotter, (den cashi di cushina, set di tayo cu marca di hotelnan) y cu un orguyo tabata muestra bishitantenan e coleccion. Esaki a causa tambe cu hopi hende a cuminsa spaar e articulanon aki; no solamente di Aruba pero di tur pais cu nan bishita. E “kick” a bira cu hopi hende a hinca den cabez pa spaar tur sorto di cos. Ni spaarmento di placa na banco por a logra e popularidad aki. Comerciantenan cu a ripara e “kick” di spaarmento a cuminsa importa tambe articulanon cu “marca” riba nan, y tur hende tabata kier nan. Agencianan di cervex y refresco tabata percura pa nan tin glas y asbak cu logo y nomber di e cervex of refresco riba dje. Na lugar di sigui pone glas di propaganda riba toonbank of riba mesa, nan a cuminsa ta ofrece glas of asbak, segun cierto cantidad cumpra of como concurso. Tabata tin e glasnan aki tur tempo, pero despues cu e “moda di spaar” a drenta, e glasnan aki tambe a cuminsa wordo usa como atraccion durante compra. A bini tur caminda hasta concursonan pa gana glas of asbak. Aruba a bira un isla di spaar. Tin hende cu tabata tin decenas di glas di souvenir di tur hotel, tur restaurant, tur cantina y hasta tabata laga familianan trece “glas di propaganda”, of “asbak di propaganda” for di exterior. Nan coleccion a bira un coleccion internacional di solamente glas, solamente forki cu cuchara, cu asbak, cu pen, cu ballpoint etc.

Awendia, esnan cu tin e coleccionnan aki ainda, tin un tesoro den cas, ya cu esakinan no ta haya nunca mas. Tin hende cu kashinan yena di souvenir di propaganda y cu ta impagable pa e decenas di aña cu e articulanon aki tin.

Ladron? Ta ken a bisa cu si bo colecciona glas di propaganda ta ladronia? Ta un kick e tabata. Ta haya nan no mester a hayabo ta bay cune e tempo ey! E uniconan cu a wordo haya sigur tabata un grupo teatral di Venezuela, cu a plunder un hotel y a bin haya tur serbette di hotel y hasta lampinan di hotel empaketa, y ni habri e hotel a habri porta oficialmente e tempo ey. Nan tabata e prome huespednan (di emergencia, prome cu e hotel tabata 100 porciento cla mes.)

Juby Naar